



Mooscht

E Bier hot sich de Vater höüchschstens sunndaachs laischte gekönnt. Do hot er sich am Nochmidaach mit seine Kartefreund im Engel gedroffe un dann hebbe die Schoofkopf odder Skat gschpielt. Manchmols do sen se beim Karteschpiele a hinnerenanner kumme. Dann hebbe se een odder zwä Sunndaach ausgesetzt. Äbber dann sen se halt doch widder zsammeghockt.

Die Wuche über do hots außer Wasser, Kaffi un Milch blous Mooscht zum Drinke gäbbe. Keen Mensch hot sichs leischte gekönnt, daß mer sou wie häüt en Kaschte Bier in de Keller schtellt. Dodevor hot jeder eens odder zwä Fässli mit Mooscht im Keller ghat. Mooscht is pur, mit Selzerswasser odder mit Wasser verdünnt gedrunke worn. Mei Modder hot aus Mooscht sogar e prima Weinschaumsoß gmaacht un die hots dann zu der Gödderschpeise gäbbe.

Im Herbscht do sen alli Öpfel rabbgmacht un zsammegläsche worn. For de Mooscht hots sogar extra Öpfel gäbbe. Die warn zum Esse mehrschstens zu sauer, sou wie unser Heinzler vom Dumbbacher. Die Öpfel sen in Kadofelsäck neikumme un dann sen se hemm gfahrn worn. Em beschte is de Mooscht worn, wenn no e paar Säck Biern dezu neikumme sen.

Einiche Läüd im Dorf, die hebbe extra Kelterhäüscher ghat, wie zum Beispiel de Borchemeeschtersvedder. Dem sei Kelterhausch war derekt näher unserer Küche. Wenn de Vedder gekeltert hot un wenn mir zum Küchefenschter rausgeguggt hebbe, dann hebbe mir den näüe Mooscht schmacke gekönnt. Do is uns es Wasser im Maul zsam-meglaafe un mir hebbe dann a immer e Häffele Süß-mooscht gegrieht.

Mir selbscht hebbe kee Kelterhausch ghat. Desweche hot unser Vater sein Mooscht vorne beis Kerpers, die wu a Frisör warn, gmaacht. Zuerscht sen die Öpfel in eme grouße Holzzuber gwäsche un durch e Mühl gedröht worn un dann sen die durchgmahlene Öpfelschtückli in die Keltern neikumme. Do hot de Öpfelsaaf scho ogfange in die grouße Holzbüde nei zu laafe. Wenn dann die Press-bretter un do obbedruff die Balke gleicht worn sen, dann is der Süßmooscht immer schtärker glaafe.

De Babba hot dann mit ere lange Eiseschtange hi- un hergepumpt. Dodebei sen die gmahlene Öpfel übber e Gwind immer schtärker zsammegepresst worn. Wenn de ganze Saaf rausgepresst war, dann is die Keltern wieder uffgedröht worn. Die Dreschtern sen uff die Mischte odder nabb die Bech gschmissee worn. De Mooscht selbscht hebbe de Vater un die Modder in Ejmer hemmgedrache un in die Fässer neigfüllt.

Die Fässer warn scho e paar Daach vorher sauber un widder dicht gmacht worn. In Schnäbbärsch hots e paar Menner gäbbe, die wu des ganz besonders gut gekönnt hebbe. Unser Fässer hot mehrschdens de Babba selber geputzt. Zwüsche die Daube is näüer Bascht neikumme, dann sen die Faßrääfe feschtgedengelt worn un zum Schluß sen die Fässer no gschwefelt worn.

Der frischgepresste Öpfelsaft war am Ofang schöü süß. Mehrschstens hebbe mir dodevo zu viel gedrunke un dann e paar Daach lang die Scheißerei griecht. In de Fässer hot de Mooscht dann scho noch e paar Daach ogfange zu gärn. Des hot en schöne Bitzler gäbbe blous dodevo hebbe mir dann scho bald nix mi drinke gedärft, weil die Modder gsagt hot, die Kinn, die wu zu viel Mooscht drinke, die döte dumm wern.

Mei Modder war e gscheiti Fraa un ich hab ere fascht alles geglääbt. In letschter Zeit kumme mir äbber immer mehr Zweifel, ob se mit dem, was se übbes Mooschdrinke gsagt hot, a recht ghat hot. Wenn mer nämlich sou sieht, wieviel Dummheit s uff de Welt gait un wasfor Dummheite am laufende Band gmaacht wern, dann därf mer scho onemme, daß des net alles blous vom Mooschtdrinke kumme kann.

